

---

# O LE MANA FAAMALOLO O LE LOTO FAAFETAI

---

**Saunia e Peresitene Russell M. Nelson**

*Peresitene o Le Ekalesia a Iesu Keriso o le Au Paia o Aso e Gata Ai*

*I le avea ai ma se foma'i, ou te iloa le taua o togafitiga lelei. O lea, uo pele, e mafai ona ou fautuaina atu ni gaoioiga se lua e fesoasoani ai ia i tatou ia lagonaina le mana faamalolo o le lotofaafetai?*

I le aluga o le 96 tausaga o lo'u olaga, ua ou vaai ai i se pa'u tele o le tamao'aiga, se taua a le lalolagi, le faatupula'ia o terarisi, le fia'ai, ma le mativa i le lalolagi atoa. Ua ou molimauina foi le manua'e o feoa'iga i le vanimonimo, le Initoneti, anoano o atina'ega faafomai, ma le lē faitaulia o isi mea fou ua ou fiafia i ai.

A o lumanai ai la'u auaunaga, sa avea a'u ma se foma'i tipitipi o le fatu ma le fatafata ma sa faaaluina le tele o itula i totonu o potu o ta'otoga. I le avea ai ma se foma'i tipitipi faapitoa, sa avea a'u ma se tagata o le vaega suesue na atiaaina le ulua'i masini o le fatu ma le māmā ina ia faaaoga i se ta'otoga tatala o le fatu o le tagata.<sup>1</sup> Mulimuli ane, sa ou maua le avanoa e fesoasoani ai e lavea'i ola o le faitau selau o gasegase; ma le faanoanoa, sa ou vaavaai atu i isi gasegase o maliliu e ui i a'u taumafaiga silisili.

I le avea ai ma se alii o le saienisi, ma se alii o le faatuatua, ua avea ai le faama'i oti i le taimi nei i le lalolagi o se popolega tele ia te a'u. I le avea ai ma se alii o le saienisi, ou te talisapaia le mana'oga taua e puipuia le pipisi o le siama. Ou te faamamaluina foi le auaunaga tuuto a foma'i tausisoifua, ma faanoanoa mo le toatele o ola ua afaina tele i le KOVITI-19. .

Peitai, i le avea ma se alii o le faatuatua, ou te vaai i le faama'i oti i le taimi nei o se tasi o le tele o faama'i ua mafatia ai lo tatou lalolagi, e aofia ai le feitaga'i, vesiga faalemalo, faailogalanu, fetaua'iga, lē faamaoni, ma le leai o se vafeāloa'i.

O saienitisi ma tagata suesue atamamai o loo galulue ma le filiga e atia'e ma tufatufa atu se vailaau e tineia ai le koronavairasi. Ae e leai se vailaau

po o se ta'otoga e mafai ona fo'ia ai le tele o mala ma faama'i faaleagaga o loo tatou fetaia'i.

Peitai, o loo i ai se vaifofo—o le tasi e foliga mai e faate'ia ona e feteenai ma o tatou manatu ma lagona faalenatura. Ae peitai, o ona aafiaga ua faamaoniaina e saienitisi faapea ai foi ma alii ma tamaitai o le faatuatua.

O loo ou faasino atu i le mana faamalolo o le *lotofaafetai*.

O le tusi a Salamo ua faatumulia i apoapoaiga e faaalua ai le lotofaafetai. E na o le tolu nei o na apoapoaiga:

“E lelei ona [faafetai] atu ia Ieova.”<sup>2</sup>

“[Ia faafetai] atu outou ia Ieova, aua e lelei lava o ia.”<sup>3</sup>

“Ia tatou o atu i ona luma ma le [faafetai].”<sup>4</sup>

Sa faailoa soo e Iesu Keriso le lotofaafetai. A o le'i faatuina mai Lasalo mai le oti, a o le'i faateleina faavavega areto ma fasi i'a, ma a o le'i tuu atu le ipu i Ona soo i le Tausamaaga Mulimuli, sa tatalo le Faaola ma tuu atu le faafetai i le Atua. E leitioa folafola mulimuli mai e le Aposetolo o Paulo, “Ia outou faafetai i mea uma lava.”<sup>5</sup>

I le silia ma le ivasefulu ma le afa o tausaga o lo'u olaga, ua ou faai'uina ai e faapea, o le *faitauina* o o tatou faamanuiaga e sili mamao atu i lo le *toefaitauina* o o tatou faafitauli. Po o a lava o tatou tulaga, o le faaalua o le lotofaafetai mo o tatou faamanuiaga o se vaifofo faaleagaga lea e vave maua ai le toomaga ma umi ona tumau.

Faamata e faasao i tatou e le lotofaafetai mai faanoanoaga, lofituina, faavauvau, ma tiga? Leai, ae na te faamālūina o tatou lagona. Na te au-maia ia i tatou se vaaiga sili atu e uiga i le faamoemoega tonu ma le olioli o le olaga.

Ua tociitiiti atoa le ono sefulu tausaga talu ai, sa ma nofonofo ai ma lo'u toalua o Dantzel i luga o le sofa ma uu lima a o ma matamata i le televise. Sa faafuasei ona palasi o ia. E ui i le a'oa'oina lelei o a'u e taulimaina le mea tonu na muta ai lona ola, ae sa le mafai ona ou laveaiina lo'u lava toalua.

Sa faamanuiaina i ma'ua ma Dantzel i ni afafine se toaiva ma se atalii se toatasi. Ma le faanoanoa, ua maliliu le toalua o na afafine i le kanesa. E leai se matua ua saunia i le oti o sana tama.

Ae, e ui i nei aafiaga ma isi aafiaga faigata, ou te *faafetai* tele ma le faavavau mo le anoanoai o le tele o mea.

Ou te faafetai i le Atua mo le toetoe 60 tausaga na ma ola faatasi ai ma Dantzel, mo se olaga atoa o le alofa ma le olioli ma manatuaga faamemelo. Ma ou te faafetai ia te Ia mo lo'u toalua o Wendy, o lē na ma feiloai i le mavae ai o le maliu o Dantzel. Ua ia faatumuliaina nei lo'u olaga i le olioli.

Ou te faafetai i le Atua mo tausaga na ou maua ma o'u afafine e toalua ua maliliu. E liusuavaia le loto o lenei tamā pe a ou vaai atu i uiga o na teineiti i foliga faapelepele o a la fanau ma fanau a fanau.

E mafai ona tatou avatu uma le faafetai mo mea matagofie o le lalolagi ma le mamalu o lagi ua tatou maua ai sina malamalama o le telē na'ua o le faavavau.

E mafai ona tatou avatu le faafetai mo le meaalofa o le ola, mo o tatou tino ma mafaufau ofoofogia ua mafai ai ona tatou tuputupu a'e ma a'oa'o.

E mafai ona tatou avatu le faafetai mo faatufugaga, tusitusiga, ma musika o loo faafaileleina o tatou agaga.

E mafai ona tatou avatu le faafetai mo le avanoa e salamo ai, toe amata, faia ni suiga, ma atia'e uiga lelei faaletagata.

E mafai ona tatou avatu le faafetai mo o tatou aiga, uo, ma ē pele.

E mafai ona tatou avatu le faafetai mo le avanoa e fesoasoani atu ai, faapelepele, ma auauna atu i le tasi ma le isi, lea ua faia le olaga ia matua sili atu ona anoa.

E mafai foi ona tatou avatu le faafetai mo o tatou tofotofoga, ia ua tatou aoao ai mea semanu tatou te le iloaina.

Ae o le mea sili o mea uma, e mafai ona tatou avatu le faafetai i le Atua, le Tama o o tatou agaga, lea ua avea ai i tatou uma ma uso ma tuafafine—o se aiga tele e tasi faalelalolagi.

I le avea ai ma se foma'i, ou te iloa le taua o togafitiga lelei. O lea, uo pele, e mafai ona ou fautuaina atu ni gaoioiga se lua e fesoasoani ai ia i tatou ia lagonaina le mana faamalolo o le lotofaafetai?

Muamua, ou te valaaulia outou—mo isi aso e fitu e sosoo ai—ia liliu ala o faasalalauga faaleagafesootai i lau oe lava ia *apitalaaga patino o le lotofaafetai*. Ia tuu i luga i aso uma *mea* e te faafetai ai, *o ai* ua e faafetai ai, ma pe *aisea* ua e faafetai ai. I le faai’uga o aso e fitu, vaai pe ua e lagonaina le fiafia tele atu ma le filemu sili atu. Faaaoga le faailoga hashtag #GiveThanks (#AvatuleFaafetai). O le galulue faatasi, e mafai ai ona tatou faalolovaia ala o faasalalauga faaleagafesootai i se galu o le lotofaafetai e oo atu i tulu’iga e fa o le lalolagi. Masalo o le a faataunuuina e lenei mea, i se vaega, le folafolaga na tuu atu e le Atua ia Tamā Aperaaamo e faapea e ala mai i ana fanau, “[o le a] manuia ... aiga uma o le lalolagi.”<sup>6</sup>

Lua, ia tatou lotogatasi e faafetai atu i le Atua e ala i tatalo i aso taitasi. Na a’oa’o e Iesu Keriso Ona soo e tatalo e ala i le faailoa muamua atu o le lotofaafetai i le Atua ona ai’oi atu lea ia te Ia mo mea tatou te manaomia. E aumai e le tatalo ia vavega.

I lena agaga, ou te fia faia ai nei se tatalo mo le lalolagi ma tagata uma o i ai. A o ou tatalo, ou te faamoemoe o le a outou lagona le musuiaina e faia lea mea e tasi, ia sasaa atu lou loto i le faafetai mo faamanuiaga lē mafaitaulia ua foai atu e le Atua ia te oe ma ai’oi atu ia te Ia e faamalolo i o outou loto, o outou aiga, o outou mālō, ma le lalolagi atoa.

Lo matou Tama o i le Lagi, i le aveia ai ma ē faimalaga faatasi i luga o Lau paneta o le Lalolagi, matou te tatalo atu ma le faamaulalo i Lau Afio. Matou te faafetai i Lau Afio mo le ola ma mea uma ua tausi ai le ola. Matou te faafetai i Lau Afio mo mea matagofie o le lalolagi, mo le faatula-gaga i le atulaulau, o paneta, fetu, ma mea uma e i ai le taua e faavavau.

Matou te faafetai i Lau Afio mo Au tulafono o loo puipua ma ta’ialaina ai i matou. Matou te faafetai i Lau Afio mo lou alofa mutimutivale ma le tausiga alofa ma le mataāla. Matou te faafetai i Lau Afio mo o matou aiga ma ē pe, ua faatumuina o matou olaga i le olioli.

Matou te faafetai atu mo tagata uma o loo tauivi e faatoilalo le faama’i oti o le KOVITI. Faamolemole ia faamanuia i latou i le puipuiga ma musu-musuga. Pe mafai ona fesoasoani mai Lau Afio e faamuta lenei vairasi ua mafatia ai le toatele na’ua o Lau fanau?

Matou te faafetai i Lau Afio mo taitai o mālō ma isi o loo tauivi ia siitia i matou. Matou te tatalo atu mo se toomaga mai fetaua’iga faaupufai. Pe mafai ona E faamanuia i matou i se agaga faamalolo na te tuufaatasia i matou e ui i o matou eseeseaga?

Pe mafai ona E fesoasoani mai ia matou salamo mai le manatu faapito, agaleaga, faamaualuga, ma le faailogalanu o soo se ituaiga, ina ia mafai ona matou auauna lelei atili ma alofa atu i le tasi ma le isi o uso ma tuafafine, ma o ni Au fanau lotofaafetai? Matou te alolofa i Lau Afio, lo matou Tama pele, ma tatalo atu mo Au faamanuiaga i luga o i matou i le suafa o Lou Alo Pele, o Iesu Keriso, amene.

Ia faamanuia outou uma taitoatasi e le Atua.

#### FAAMATALAGA

<sup>1</sup> I Mineapolisi, Minesota, Mati 1951.

<sup>2</sup> Salamo 92:1.

<sup>3</sup> Salamo 136:1.

<sup>4</sup> Salamo 95:2.

<sup>5</sup> 1 Tesalonia 5:18.

<sup>6</sup> Kenese 12:3.

